

Sa Deliryo  
(ni Danilo C. Diaz)

Hindi ko man malapitan  
Akin siyang minamasdan  
Hinihintay ang paggalaw  
Umaasam, nagdarasal.

Kagat ko ang aking labi  
Hindi siya ngumingiti  
Hindi tulad na palagi  
Pakaway s'yang bumabati.

Tanaw ko at parang dinig  
Ang pintig ng kanyang dibdib  
Damang-dama ko ang sakit  
Ng sigaw n'ya, pangininginig.

Kung siya ay umuungol  
Ano'ng kanyang 'binubulong  
Sarili ko'y tinatanong,  
S'ya kaya ay nauulol.

Habang palad ko ay dakot  
Ang tuhod ay nangangatog  
S'ya rin kaya'y natatakot  
Tumatawag pa sa Diyos?

Ngunit aking natitiyak  
Nang luha n'ya ay pumatak  
Tangi niyang hinahangad  
Ako sana ay mayakap.

#

dcd/dodie  
14May2020

